



Inatsisartunut ilaasortaq Doris Jakobsen, Siumut  
-/maani

## Qaarsuarsuk pillugu §36 naapertorlugu apequteqaat

Asasara Doris Jakobsen

Naalakkersuisut Inatsisartut suleriaasianni § 36, imm. 1 naapertorlugu  
apeqquteqaatit tiguaat.

13.07.2009

Postboks 909  
3900 Nuuk  
Oq/tel +299 34 54 00  
Fax +299 34 54 10  
aan@gh.gl  
www.nanoq.gl/aan

### Apeqqut:

"Naalakkersuisunngortut qaqugu Qaarsuarsummi mittarfik matuniarpaat, aammalu Naalakkersuisunngortut Qaarsuarsummi mittarfik pillugu allanik pilersaaruteqarpat?"

### Akissut:

Qaarsuarsummi mittarfiup matuneqarnissaanut Naalakkersuisut maannakkorpiaq pilersaaruteqanngillat, aammalu siunnersuutinik, innuttaasut allakkatigut pilersuinikkullu sullinneqarsinnaanerannut angallassinikkullu sullissinernik ajornerulersitsisussanik siuarsaanissaminnik kissaateqanngillat.

Akerlianik Kalaallit Nunaanni angallannerup ineriartortinneqarnissaa Naalakkersuisut pingaartippaat, nunap immikkoortuani, nunap iluani taamatullu nunat tamat akornanni ineriartortitsinermut suliassaqarfik pingaarutilimmik inissisimammat. Angallannermut politikkimik, Namminersorlutik Oqartussat aningaasaqarnerup isumannaatsuunissaanut anguniagaannut pingaarnernut tapertaasussamik, tamatumalu peqatigisaanik inuit nuttarsinnaanerannut nunallu iluani ataqatiginnerannut siursaataasussamik pilersitsinissaq Naalakkersuisut kissaatigaat.

Kisiannili aamma Nunap Karsiani pissutsit aammalu aningaasat atorneqarsinnaasut killilinnik amerlassusillit atorlugit innuttaasut sapinngisamik annertunerpaamik angallanneqarsinnaanissaat Naalakkersuisunit isiginiarneqarput kissaatigineqarlutillu. Taamaattumik Kalaallit Nunaanni angallannermut tapiissutit killissarititassatut aalajangersarneqartut iluanni atorneqartariaqarput, aammalu angallanneq suliassaqarfittut ineriartortitsinermut tapertaasussatut isigineqartariaqarluni. Tamanna pissutigalugu assartuinnermut politikki, pisariaqanngitsumik Nunap Karsianut annertuumik aningaasartuutaanngitsumik

innuttaasut amerlanerpaat angalasinnaaneranannik nassataqarsinnaasoq  
Naalakkersuisunit kissaatigineqarpoq.

Taamaattumik piffissami naalakkersuisuuffiusumi matumani Kalaallit Nunaanni  
angallanneq ineriartorteqqinneqassappat siuarsarneqassappallu tamatuma  
pissusiviusut eqqarsaatigalugit minnerunngitsumillu aningaasaqarneq  
eqqarsaatigalugu ingerlanneqarnissaa Naalakkersuisut anguniagaraat. Aningaasat  
atorlugit sullinneqarnerup annertunerpaap pissarsiarineqarsinnaanissaa  
eqqarsaatigalugu periarfissat tamarmik misissuiffigineqarnissaat Naalakkersuisut  
kissaatigaat: Suut tamarmik qaqqinneqassapput.

Atortut annertunerpaamik atorneqarnissaat anguniarlugu nunatsinni mittarfiit  
tamarmik qanoq atorneqarsinnaanersut misissuiffigineqarnissaa Naalakkersuisut  
kissaatigaat. Kalaallit Nunaanni mittarfiit 59-iuput, tassalu najukkani helistoppiniit  
Imarpik qulaallugu mittarfissuarnut, kiisalu angallaviit arlallit sullissisunut  
assigiinngitsunut agguagaasut. Angallannermi atortut angallaviillu pioreersut  
Naalakkersuisut isumaliutersuuteqarnerminnut ilaatippat, taamatullu mittarfinnik  
nutaanik sanaartornissaq, timmisartuussivissanik nutaanik pilersitsinissaq,  
atortunik nutaanik pisiortornissaq aningaasalersueriaatsinillu nutaanik  
pilersitsinissaq Kalaallit Nunaanni assartuinermi suliassaqaqarfiup  
aannertusarneqarneranut atatillugu isumaliutersuutitut pissusissamisuuginnartutut  
ilaatinneqarlutik. Sumiiffiit ilaat qulimiguullit atorlugit sullinneqarnissaat  
iluqaqtaanerussanersoq misissuinermit ilaatinneqassaaq. Ilassutigalugu  
oqaatigineqassaaq, kiffartuunneqarnissamik isumaqatigiissutit distriktinut aqqaneq  
marlunnut agguarneqarsimasut tunngavigalugit sullissinermut taarsiullugu,  
inuaqatigiinnut kalaallinut isumaqatigiissummik aningaasaqarnikkut  
pissarsiaqarnerpaanissaq anguniarlugu sullissisumut ataatsimut  
kiffartuunneqarnissamik isumaqatigiissummik ataatsimoortumik  
angusaqartoqarsinnaaneranut periarfissanik misissuinissaq Naalakkersuisut  
kissaatigimmassuk. Angallasseriaatsip pioreersup ineriartortitsiviusinnaasullu  
misissuiffigineqarneratigut, suliassaqarfik najukkani soqutigisanit annertuumik  
sunnigaasimasoq ataatsimut isigalugu angallannikkut nunamut tamarmiusumut  
iluqaqtaasumik iluarsivigineqarsinnaanersoq paasineqassaaq.

Misissuineq Kalaallit Nunaanni angallannerup siunissamut ungasissumut  
pilersaaruserneqarnissaanut tunngaviliissaaq, tassanilu Naalakkersuisut kommuni  
sullissisullu suleqatigineqarnissaat kissaatigaa: Immikkoortut ataasiakkaat  
isiginiarpallaarnagit angallannerup tamarmiusup, suliassaqarfimmi sullissisunit  
tamanit - timmisartuutileqatigiiffiit, mittarfiit, umiarsuaatileqatigiiffiit il.il. –  
suleqataaffigineqarluni aallunneqarnissaa pingaaruteqarpoq. Najooqutassat  
pigineqareersut tamarmik saqqummiunneqarnissaat, aammalu oqallinnermi  
angallannerup ilusissaata naammassineqaqqammersup, angallasseriaatsit  
assigiinngitsut takussutissiornerinut atatillugu angallannerup inuaqatigiillu  
aningaasaqarnerinik naliliinermi aalajangiinissamut sakkussatut  
tapersiisutigineqartup tunngavigineqarnissaa Naalakkersuisunit  
pingaartinneqarpoq. Angallannermi inuaqatigiillu aningaasaqarneranni

pissusiviusut ataqqillugit tunngavissalimmik aningaasalersuinissaq Naalakkersuisut kissaatigaat.

Tassalu Naalakkersuisut Qaarsuarsuup matuneqarnissaanut pilersaarutini aalajangersimasunik saqqummiussisimanngillat, aammalu mittarfinnik matusinissamik sanaartornissamilluunniit aalajangersimasunik pilersaaruteqaratik, kisiannili assartuinnermut politikkip, Kalaallit Nunaannut tunngatillugu politikikkut anguniagaannut pingaarnernut tapertaasussanik siuarsaanissaq eqqarsaatigalugu siuarsarneqarnissaa Naalakkersuisunit kissaatigineqarpoq.

Ikinngutinnersumik inuulluaqqusillunga

Jens B. Frederiksen